


JESUS ANG ANAK SANG DIOS



Ang Matun-an Nimo sa Sini nga Leksyon

Ang Anak kag ang Iya Amay

Wala sing ginkamunoan nga pag-updanay sang Amay
kag Anak

Pagkilala sang Anak sa Amay

Pagkilala sang Amay sa Anak

Ang Anak kag ang Iya mga Sumolunod

Pagkilala sang mga sumolunod sa Anak

Pagkilala sang Anak sa mga sumolunod

Wala sing katapusan nga pag-updanay sang Anak
kag sang mga sumolunod

Si Jesu-Kristo Anak sang Dios. Tuman gid ka malahalón kon ano ang ginatuohan naton nahanungod sa Iya. Sobra pa Sia sa isa lamang ka maayo nga tawo — sobra pa sa isa lamang ka manunodlo. Sia ang Kristo, ang Anak sang matuod nga Dios. Nakapat-od kita, nakaseguro, wala magsayop, nga Sia Dios nga nagkari sa kalibutan sa dagway sang tawo. Nahibaloan naton nga may gahum Sia sa paghilway sa aton gikan sa gahum sang sala kag sang yawa.



Ang Anak kag ang Amay

Wala sing ginkamunoan nga pag-updanay sang Amay kag Anak

Sang wala pa matawo si Jesus sa Betlehem kaupod na Sia sang Iya Amay sa tanan nga tion. Si Miqueas nagsulat nahanungod sa matawo nga Mesias:

Miqueas 5:2. . . . nga iya gingikanan kutob pa sa dumaan, sa wala sing katapusan.

Sang gab-i nga wala pa mapatay si Jesus nagpangamuyo Sia:

Juan 17:15. “Kag karon, Amay, himayaa ako kaupod nimo sang himaya nga naagum ko sadto any kaupod nimo sa wala pa ang kalibutan.”

Si Jesus kaupod sang Dios, nagpangabudlay kaupod sa Dios, sa pagtuga sang kalibutan. Si Juan nagtawag kay Jesus nga Pulong kag ginpamunoan niya ang iya ebanghelyo paagi sa pagsugid sa aton nga:

Juan 1:1-3. Sa ginsugoran amo ang Pulong, kag ang Pulong kaupod sa Dios, kag ang Pulong Dios. Sia sa ginsugoran kaupod sa Dios; ang tanan nga butang ginhimo niya, kag sa wala sia walay bisan ano nga nahimo sang ginhimo.

Nakabulig ini sa pagpaathag sang isa ka misteryo nga nagpalibog sa madamo nga mga bumalasa sang Daan nga Katipan. Sin-o bala ang ginhambalan sang Dios sang magsiling Sia: “Himoon *ta* ang tawo sa dagway *naton*, suno sa kaangay *naton*”? Kag ngaa nga ginhambalan sang Dios si Isaias nga ang matawo nga Mesias pagatawgon Dios nga gamhanan, Amay nga nagapadayon?

Ang Biblia nagatudlo nga may isa lamang ka matuod nga Dios — ang Manunuga. Apang ang Daan nga Katipan nagagamit sang ngalan — Elohim — nga nagakahulogan — madamo, sing kapin sa 2,700 ka beses. Ang *Elohim*, tinaga nga nagakahulogan — madamo, sa paglaragway sang bulohaton sang Dios. Amo ini ang paglaragway sang pagtuga sang Dios sang mga butang nga natuga. Kon kaisa ginagamit ini kaupod sang tinaga nga sa diin ang madamo nga mga tawo nagapangabudlay nga daw sa nagaisahanon lamang. Ang Biblia nagagamit sang tinaga nga *isa* sa pagpahayag sang may pakaisa ukon numero. Ang diosnon nga pagkaisa nga pagtawag naton sa Dios ginasakupan sang kapin sa isa ka persona.

Genesis 1:1, 2, 26. Sa ginsugoran gintuga sang Dios (Elohim) ang mga langit kag ang duta. . . kag ang Espiritu sang Dios nagagiho sa nawong sang mga tubig. . . Niyan ang Dios (Elohim) nagsiling, Himuon *ta* ang tawo sa dagway *naton*, suno sa kaangay *naton*.



Samtang nagapadayon ang bugna sang Dios sa Daan nga Katipan kag sa Bag-o, natun-an naton nga ang tatlo ka personas ginatawag Dios – ang Amay, ang Anak, kag ang Balaan nga Espiritu. Ginatawag naton sila nga Balaan nga Trinidad – nga nagakahulogan *ang tatlo ka*


mga balaan nga persona sa isa. Sa tanan nga tion naga-pangabudlay sila nga may himpit nga pagkaisa kag paghiuyon. Ginhimo nila ini sa pagtuga sang mga butang nga natuga. Ginhimo nila ini sang si Jesus yari diri sa kalibutan. Kag pagahimuon nila ini sa tanan nga tion. Ang ngalan nga Dios, katulad sang apelyedo sang isa ka panimalay, ginagamit para sa Amay, Anak, kag Balaan nga Espiritu. Sa pagkilala sa ila, ginatawag naton ang Amay nga Dios, ang Anak sa Iya dutan-on nga ngalan – Jesus, kag Balaan nga Espiritu.

Si Jesus naghambal nahanungod sang Iya pagkaangot sa Amay subong nga isa, ukon Sia yara sa Iya Amay, kag ang Iya Amay yara sa Iya.

Juan 17:21-23. “Nga sila tanan mangin-isa; subong nga ikaw, Amay, sa akon, kag ako sa imo. . . agud nga mangin - isa sila subong nga kita isa, ako sa ila kag ikaw sa akon.”

Mabasahan naton sa Juan 17:5 nga ginsabat sang Dios nga Amay ang pangamuyo ni Jesus. Pagkatapos nga napatay si Jesus para sa aton mga sala, ang Dios nagbayaw sa Iya gikan sa mga minatay. Pagkatapos sang kap-atan ka adlaw madamo nga mga katawhan ang nakakita sa Iya nga nagbalik sa langit. Sang ulihi ginhatagan sang Dios

sing kahigayunan ang pila ka mga katawhan nga makita si Jesus sa Iya himaya didto sa langit kaupod sang Amay. Si Esteban nakakita sini.



Mga Binuhatan 7:55.
Apang sia (Esteban) nga puno sang Espiritu Santo, nagtangla sa langit kag nakakita sang himaya sang Dios, kag kay Jesus nga nagatin-dog sa tuo sang Dios.

Buhata Ini

1. Pilia ang husto nga ngalan: Elohim, Miqueas, Esteban, Jesus, Juan, Balaan nga Trinidad, Isaias.
 - a) nagtawag sa Mesias nga Dios nga gamhanan.
 - b) naghambal nga ang gingikanan sang Mesias kutob pa sa dumaan, wala sing katapusan.
 - k) ngalan sang Dios nga ang kahulogan - madamo.
 - d) nagakahulogan Dios sa isa.
 - e) nagsulat nahanungod kay Jesus sa pagtuga sang mga butang nga natuga.
 - g) naghambal nga Sia isa sa Amay.
 - h) nakakita kay Jesus sa langit kaupod sang Amay.

Nahibaloan ni Jesus nga ang Dios amo ang Iya Amay kag ginpahibalo Niya ang iban nahanungod sini. Padayon Sia nga nagahambal nga ang Dios amo ang Iya Amay (bisan pa sang nagapanuigon pa lamang Sia sing 12 anyos). Ginakilala Niya ang Dios nga Iya Amay sa Iya mga pangamuyo. Ginhambalan Niya ang mga katawhan nga ang Dios nagpadala sa Iya sa paghatag sang kabuhi nga walay katapusan sa kay bisan sin-o nga magatuo sa Iya. Nagsiling Sia:

Juan 3:16. “Kay ginhigugma gid sang Dios ang kalibutan sa bagay nga ginhatag niya ang iya bugtong nga Anak, agud nga ang bisan sin-o nga magtuo sa iya indi mawala kundi may kabuhi nga walay katapusan.”

Ginpadunggan ni Jesus ang Iya Amay paagi sa pagbuhat sang mga butang nga nangin kabangdanan sang pagpadala sa Iya sang Dios agud buhaton. Ginpahibalo Niya ang mga katawhan nga ang tumalagsahon Niya nga mga tudlo kag mga milagro naghalin tanan sa Iya Amay.



Juan 8:28, 19. “. . . Ako wala nagahimo sing bisan ano sa akon kaugalingon nga pagbulot-an, kundi suno sa gintudlo sa akon sang Amay ginpamulong ko ining mga butang. Kag ang nagpadala sa akon kaupod nakon; wala niya ako pagpabayai nga isa lamang, kay nagahimo ako sa gihapon sang kahalamut-an sa iya.”

Buhata Ini

2. Sauloha ang Juan 3:16.
3. Ano ang ngalan nga gingamit ni Jesus para sa Dios sa Iya mga pangamuyo?

Pagkilala sang Amay sa Anak

Nahibaloan naton nga si Jesus Anak sang Dios bangod kay ang Dios mismo ang nagpaathag sini. Ginapadunggan sang Dios ang Iya Anak. Si Jesus nagsiling:

Juan 8:18, 54. “. . . Ang Amay nga nagpadala sa akon nagasaksi sa akon ... Kon ako nagahimaya sang akon kaugalingon, ang akon himaya walay pulos; ang akon Amay amo ang nagahimaya sa akon; nga nahanungod sa iya ginasiling ninyo nga sia inyo Dios.”

Ginapadunggan sang Dios si Jesus kag nagapamatuod nga Anak Niya si Jesus paagi sa: 1) mga manugtunda, 2) ang Balaan nga Espiritu, 3) tumalagsahon nga mga palatandaan.

Mga Manugtunda. Ginpadala sang Dios ang langitnon Niya nga mga mensahero, ang mga manugtunda, sa pagpahibalo sa mga katawhan nga Anak Niya si Jesus.



Ang mga manugtunda nag-sugid kay Jose kag Maria nga Anak sang Dios ang Lapsag nga matawo sa isa ka ulay nga babayi. Ang mga manugtunda nagbalita sa mga manugpahalab sang karnero sa latagon sang Betlehem nga ang Manluluwas natawo na. Duha ka beses nga nag-abot ang mga manugtunda sa daku nga krisis sa kabuhi ni Jesus sa pagpalig-on sa Iya kag sa pagpabakod sang Iya balatyagon. Ang mga





manugtunda amo ang nagkuha sang bato gikan sa lulobngan ni Jesus kag ang mga manugtunda man ang nagpahibalo sa Iya mga sumolunod nga si Jesus nabanhaw na gikan sa mga minatay. Kag sang magkayab si Jesus pa langit, ang mga manugtunda nagpakita sa guban sang tumalan-aw. Nagsiling sila nga katulad sang pagbayaw kay Jesus pa langit, magabalik Sia liwat sa amo man nga paagi sa pila ka adlaw.

Ang Balaan nga Espiritu. Ginpadala sang Dios ang Iya Espiritu sa pagpadungog kay Jesus kag sa pagpahibalo sa mga katawhan kon sin-o si Jesus. Ang Balaan nga Espiritu nagpuno kay Elisabet, Zacarias, Simeon, Maria, kag Ana, kag nagpamulong paagi sa ila. Ginsugiran nila ang mga katawhan nga ang Lapsag nga si Jesus amo ang Mesias. Ginpun-an sang Dios si Juan Bautista sang Iya Espiritu kag ginpadala sia subong nga isa ka pinasahi nga mensahero sa pagpakilala kay Jesus subong nga Anak sang Dios kag Kordero sang Dios nga nagakuha sang sala sang kalibutan. Ang Balaan nga Espiritu nagkunsad kay Jesus kaangay sang salampati sang bautisohan Sia. Ginhaplas sang Balaan nga Espiritu si Jesus para sa Iya pagpangalagad subong nga Mesias - ang Hinaplas - puno sang kaalam kag gahum sang Dios.



Tumalagsahon nga mga palatandaan.
Ang Dios nagagamit sang madamo nga mga palatandaan sa pagpamatuod sa Iya Anak. Isa ka bituon ang nagtuytoy sa tatlo ka mago pakadto sa Lapsag nga si Jesus. Tatlo ka tion nga nabatian sang mga katawhan nga nagpamulong ang Dios gikan sa langit nga nabatian nila nga ang Dios nagsiling:



Mateo 3:17; 17:5. “Ini hinigugma ko nga Anak, nga sa iya nahamuot ako.”

Ang mga milagro nga ginbuhat ni Jesus pagpamatuod sang Dios nga amo Sia suno sa ginhambal Niya nga Sia amo - ang Anak sang Dios. Ginhatagan sang Dios ang mga gintuton-an sing kahigayunan nga makita ang himaya sang Iya Anak sa tion sang ginatawag naton nga - ang pagbalhin sang dagway.

Mateo 17:2. Kag nagbalhin ang iya dagway sa atubangan nila, kag nagsilaw ang iya nawong subong sang adlaw, kag ang iya panapton nagputi subong sang kapawa.

Ang Dios nagpamatuod para sa Iya Anak sang napatay si Jesus. Ang duta nag-uyog. Ang kadulom nagtabon sa adlaw. Ang kumbong sa templo napihak sa tunga.

Pagkatapos sang tatlo ka adlaw ginpasidunggan sang Dios ang Iya Anak paagi sa pagbanhaw sa Iya gikan sa mga minatay. Sang ulihi gindala Sia sang Dios pauli sa langit sa panulok sang isa ka daku nga guban. Pagkatapos ginhatagan Niya sing kahigayunan ang pila ka mga tawo nga makita si Jesus didto sa langit sa tupad sang Iya Amay. Kag sang nagpangamuyo ang mga gintuton-an sa Dios sa ngalan ni Jesus, ginsabat Niya ang ila mga pangamuyo kag nagpahayag sang mga milagro. Matuod gid nga ang tanan nga nagatuo sa Dios dapat nga magtuo sa Iya pagpamatuod nahanungod sa Iya Anak nga si Jesus.

Buhata Ini

1. Sauloha ang pinamulong sang Dios sa Mateo 3:17.
2. Paano ang Dios nagpamatuod nga Anak Niya si Jesus? Isulat ang indi magkubos sa tatlo ka mga paagi ukon mga tinion sa idalum sining tagsa ka bahin.
 - a) Ang mga manugtunda nagpahayag
.....
.....
 - b) Ang Balaan nga Espiritu
.....
.....
.....
 - k) Tumalagsahon nga mga palatandaan
.....
.....
.....

Ang Anak kag ang Iya mga Sumolunod

Katulad sang lubos nga pagkilalahay sa tunga sang Amay kag sang Anak may yara man nga lubos nga pagkilalahay sa tunga sang Anak sang Dios kag sang Iya mga sumolunod. Ang bunga sining pagkilalahay amo nga may pagpakig-angot kita nga wala sing katapusan sa Anak sang Diyos.

Pagkilala sang mga sumolunod sa Anak

Yadtong mga nagsunod kay Jesus sang yari pa Sia diri sa duta naghimo sadto bangod kay nagatuo sila sa Iya. Nakilala nila nga amo Sia suno sa ginhambal Niya nga Sia – ang Anak sang Dios. Kag hayag nga ginpakita nila ang ila pagtuo sa Iya.

Mateo 16:16. Nagsabat si Simon Pedro, *Ikaw ang Cristo, ang Anak sang Dios nga buhi.*

Juan 20:28. Si Tomas nagsabat sa iya, *Ginuo ko kag Dios ko.*

Paano naman ang mga sumolunod ni Jesus karon? Paano naton Sia makilala? Paagi bala sa pakakatapo sang simbahan? Ukon sa pagkatinawag nga Kristohanon? Agud magmangin matuodtuod nga Kristohanon dapat kita magtuo sa kay Ginuong Jesu-Cristo - kilalahon Sia nga Anak sang Dios kag Manluluwas naton. Paano naton mahimo ini? Itugyan naton ang aton mga kabuhi sa Iya, magsalig sa Iya, kag sundon Sia kon sa diin kita ginatuytoy an.

Ginsulat ni Juan ang iya ebanghelyo sa pagpamatuod nga si Jesus Anak sang Dios, agud nga makatuo kita sa Iya kag makabaton sang kabuhi nga walay katapusan. Sa iya mga sulat ginsulit ni Juan ang mensahe sang Dios nga ang solo nga paagi sa pag-angkon sining kabuhi yara sa Iya Anak.

Juan 20:31. Apang ini sila nasulat nga magtuo kamo nga si Jesus amo ang Cristo, ang Anak sang Dios, kag sa pagtuo may kabuhi kamo sa iya ngalan.

Juan 5:11, 12. . . . Ang Dios naghatag sa aton sing kabuhi nga walay katapusan, kag ining kabuhi yara sa iya Anak. Ang nakabaton sang Anak may kabuhi; ang wala makabaton sang Anak walay kabuhi.

Buhata Ini

6. Ano nga libro ang pinasahi nga ginsulat sa pagbulig sa aton sa pagkilala kay Jesus subong nga Anak sang Dios kag magtuo sa Iya?
 - . . . a) Ang Ebanghelyo ni Mateo.
 - . . . b) Ang Ebanghelyo ni Markos.
 - . . . k) Ang Ebanghelyo ni Lukas.
 - . . . d) Ang Ebanghelyo ni Juan.

7. Suno sa 1 Juan 5:11, 12, sa diin ang kabuhi nga walay katapusan nga ginahatag sang Dios sa aton?

.....

Ang pagkilala sang Anak sa mga sumolunod

Sang wala pa kita matawo si Jesus nakakilala na sa aton. Sang wala pa mahimo ang kalibutan, ang Dios nga Amay, Anak, kag Balaan nga Espiritu nakakita sa aton sa ila plano para sa lahi sang tawo. Nakita Nila kita nga ginlalang sa dagway sang Dios, mga kaanakan sang Dios, nagapakigbahin sa Iya gugma, nagakalipay sa maayo nga mga butang nga ginahanda Niya para sa aton, magkabuhi kaupod Niya sa himpit nga kalipay.

May iban pa gid nga nakita ang Dios. Nakita Niya nga ang lahi sang tawo magatalikod sa Iya nga nagaribok kag magapili sang mga dalan sang sala kag kamatayon. Nakita sang Dios nga nagaantos kita sa bunga sang sala kag gintagudilian sa kamatayon nga walay katapusan. Manriribok kag indi mapinasalamaton nga kaangay naton, ginhigugma Niya kita sang himpit nga gugma. Ang Amay, Anak, kag Balaan nga Epiritu, naghimo sang plano para sa aton kaluwasan.

Sang mga makasasala pa kita, ang Anak sang Dios nagpili sa aton agud magmangin sumolunod Niya. Nakita Niya ang aton sala kag ginkuha ang pamatbat sang kamatayan sa aton bahin. Nakita Niya ang aton mga kaluyahon kag ginahatagan kita sing kusog. Ginabaton Niya ang tanan nga nagapalapit sa Iya kag ginahilway sila gikan sa gahum sa sala.



Mga Taga Efeso 1:4, 5. Subong nga ginpili kita sang Dios sa kay Cristo sa wala pa mapasad ang kalibutan, agud nga magbalaan kita kag walay kasawayan sa iya atubangan. Sia nagtangdo sa aton sa gugma nga mangin-iya mga anak paagi kay Jesu-Cristo, suno sa katuyoan sang iya kabubut-on.

Ang mga ngalan nga gingamit ni Jesus para sa Iya mga sumolunod sang yari pa Sia sa duta nagapakita sa aton sang Iya gugma para sa tanan nga magasunod sa Iya. Ginapatungdan Niya sila subong nga magamay Niya nga mga kabataan, mga anak sang Dios, suga sang kalibutan, mga ginhatag sang Dios sa Iya, Iya iglesia, Iya mga kautoran, bahin sang Iya kaugalingon subong nga sanga sa ubas.

Ginakilala bala naton si Jesus subong nga aton Manluluwas kag Ginuo? Kon amo, ginakilala Niya kita subong nga Iya.

Mateo 10:32, 33. “Busa ang tagsatagsa nga magtuad sa akon sa atubangan sang mga tawo, ituad ko man sia sa atubangan sang akon Amay nga yara sa langit; apang ang bisan sin-o nga magpanghiwala sa akon sa atubangan sang mga tawo, ipanghiwala ko man sia sa atubangan sang akon Amay nga yara sa langit.”

Juan 1:12. Apang sa tanan nga nagbaton sa iya, nga nagtuo sa iya ngalan, ginhatagan sila niya sing gahum sa pagkamangin-anak sang Dios.

Buhata Ini

8. Kopyaha halin sa Mga Taga Efeso 1:4, 5 ang mga dinalan nga nagasabat sining mga pamagkot

a) Sin-o ang nagpili sa aton?

.....

b) Kasan-o kita ginpili?

.....

k) Sa diin kita sang ginpili Niya kita?

.....

d) Paano Sia nagtangdo sa aton agud mangin

Iya?

e) Sa ano nga paagi ginplano sang Dios nga

maçala kita sa Iya kaugalingon?

g) Ano ang katuyoan sang gabubot-on sang

Dios?

.....

9. Ano ang tawag ni Jesus sa Iya mga sumolunod? Halin sa imo hunahuna, isulat ang indi magkubos sa 5 ka mga ngalan kag pagkatapos tan-awa ang libro kag isulat ang iban pa nga mga ngalan. Markahi ang mga ngalan nga buot mo gamiton ni Jesus para sa imo

.....

.....

.....

Wala sing katapusan nga pag-updanay sang Anak kag sang Iya mga sumolunod

Buot ni Jesus nga mangin kaupod Niya kita bangod nagahigugma Sia sa aton kag nakahibalo Sia nga ang aton kabuhi, kalipay, kag palaabuton nasandig sa aton pagpakig-angot sa Iya. Ginhatagan Niya kita sang bag-o nga kabuhi para sa lawas, kalag, kag espiritu. Sa Iya makakita kita sang matuodtuod nga kalipay, katumanan sang tanan, kag gahum Niya sa paglutos sang yawa. Ang tanan nga nagalakat kaupod Niya karon magakabuhi kaupod Niya sing walay katubtoban sa langit. Si Jesus nagsiling:

Juan 10:10. “Ako nagkari agud nga may kabuhi sila, kag may kabugana sini.”

Juan 14:6. “Ako amo ang dalan, kag ang kama-tuoran, kag ang kabuhi; walay magaabot sa Amay, kundi paagi sa akon.”

Juan 3:35, 36. Ang Amay nagahigugma sang Anak, kag nagtugyan sa tanan nga butang sa Iya kamot. Ang magatuo sa Anak may kabuhi nga walay katapusan; apang ang wala nagatuman sa Anak indi makakita sang kabuhi, kundi ang kasingkal sang Dios nagapabilin sa iya.”

Tama kalapit ang aton pagpakig-angot sa kay Jesus sa bagay nga ang tanan nga nagatuo sa Iya yara kay Cristo kay Sia yara sa aton. Sia ang ubas; kita ang mga sanga.



Juan 15:5. “Ako amo ang puno sang ubas, kamo ang mga sanga. Ang nagapabilin sa akon, kag ako sa iya, sia amo ang nagapamunga sing madamo, kay luwas sa akon wala kamo sing mahimo.”

Ginlaragway ni Pablo ang aton pagpakig-angot kay Cristo subong nga mga katapo sang Iya lawas. Si Jesus amo ang Ulo. Ang Iya iglesia amo ang Iya lawas. Ang tanan nga mga kinamatarung kag mga prebilihiyo sang walay sala nga Anak sang Dios, tanan Niya nga kamang-garan sa himaya, tanan nga gugma kag paghiusa sa tunga sang Anak kag sang Amay nangin aton man subong nga mga katapo sang Iya lawa!

Mga Taga Colosas 1:17, 18, 27, 28. Sia una sa tanan nga butang, kag sa iya ang tanan nga butang naga-tingub, Sia amo and ulo sang lawas, nga amo ang iglesia sia amo ang ginsugoran, ang panganay gikan sa mga patay, agud nga tanan nga butang mangin nahauna sia.

. . . . Si Cristo sa inyo, ang paglaum sang himaya. Sia ginbantala namon, . . . agud nga amon mapaa-tubang (sa Dios) nga hamtong ang tagsa ka tawo kay Cristo.

Buhata Ini

10. Sauloha ang Juan 10:10 kag 14:6.

11. Suno sa Juan 14:6 ano ang tatlo ka butang nga ginsiling ni Jesus nahanungod sa Iya?

.....

12. Usisaa ang imo nga sabat kag sulati ang imo rekord sang bumolutho para sa leksyon 3.

Leksyon 3 - Mga Sabat

Ang mga pamangkot nagakinahanglan sang 33 ka mga sabbat. Kon may husto ikaw nga mga sabbat nga halin sa 29 tubtob sa 33, gradohi ang imo kaugalingon sing, labing maayo; halin sa 21 tubtob sa 28, maayo; halin sa 16 tubtob sa 20, kasarangan. Kon manubo sa 16 ang husto mo nga sabbat, basaha liwat ang leksyon agud mahibaloan mo sing maayo.

1. a) Isaias, b) Miqueas, k) Elohim, d) Juan, e) Jesus, g) Esteban.

2. Amay

5. (Tatlo sa kada isa)

- a) Ang mga manugtunda nagpahayag: kay Jose, Maria, mga manugpahalab, Jesus, sa lulobngan, sa pagkayab.

- b) Ang Balaan nga Espiritu: nagpamulong paagi kay Elizabet, Zacarias, Maria, Ana, Simeon, Juan Bautista; nagkunsad kay Jesus katulad sang salampati, naghaplas kay Jesus sa gahum kag kaalam.

- k) Tumalagsahon nga mga palatandaan: bituon, tingog gikan sa langit, mga milagro nga nabuhat ni Jesus, pagbalhin sang dagway, linog, kadulom napihak ang kumbong sa tunga, pagkabanhaw, pagkayab pa langit, mga milagro subong nga sabbat sa pangamuyo sa Iya ngalan.

6. d) Ang Ebanghelyo ni Juan.

7. Sa Iya Anak.

8. a) Dios

- b) Sa wala pa mapasad ang kalibutan.

- k) Sa kay Cristo

- d) Sa gugma

- e) Paagi kay Jesu-Cristo.

- g) Mangin iya mga anak paagi kay Jesu-Cristo.

9. Lima sini: Magamay Niya nga mga kabataan, suga sang kalibutan, asin sang kalibutan, Iya nobya, Iya mga tagapamatuod, mga ginhatag sang Dios sa Iya, Iya diutay nga panong sang karnero, mga pinili Niya, Iya iglesia, Iya mga kautoran, bahin sang Iya kaugalingon subong nga mga sanga sang ubas.

11. Ang dalan, ang kamatuoran, kag ang kabuhi.

Kadamuon sang huston nga sabbat . . . Grado
Karon sulati ang imo rekord sang bumolutho para sa leksyon 3.